

Matumuuna Naalakkersuisut Inatsisartut Suleriaasianni § 33 naapertorlugu aalajangiiffigisasatut siunnersuut manna saqqummiuppaat:

Naalakkersuisut 2017-ip qiteqqunnerani nungusaataannngitsumik ivigartortitsinissaq pillugu misissuineramik aallartitsinissamat peqquneqarnissaannik Inatsisartut aalajangiiffigisassaattut siunnersuut. Misissuinerami neriniarfiusartut nersutaateqarnermut ullumikkut atorineqartartut eqqannguaniittullu aallaavigineqassapput, kiisalu nungusaataannngitsumik atuineq innarlinngikkaluarlugu neriniarfinni nerisaqarneq qanoq annertutigisog attanneqarsinnaanersoq pillugu naliliinermik imaqassalluni.

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)

Tunngavilersuut

UKA 2016-imi Naalakkersuisut peqquneqarnissaat Inatsisartut akueraat ”nungusaataannngitsumik neriniartitsisarnerup misissorneqarnissaanut UKA 2017-imi *siunnersuummik saqqummiusseqqunissaat, tassanilu misissuinerami periusissat, piffissalersuineq aamma akissajaatit imaritinneqassapput. Misissuinerami neriniarfiusartut nersutaateqarnermut ullumikkut atorineqartartut eqqannguaniittullu aallaavigineqassapput, kiisalu nungusaataannngitsumik atuineq innarlinngikkaluarlugu neriniarfinni nerisaqarneq qanoq annertutigisog attanneqarsinnaanersoq pillugu naliliinermik imaqassalluni*”. Matumuuna siunnersuut taanna pilersaarullu tasunga atasog saqqummiunneqarnissamat piareerput.

Naalakkersuisut siunnersuutigaat misissuinerit 2017-ip qiteqqunnerani aallartinneqassasut, aammalu misissuinerit Pinngortitaleriffimmi ilisimatuunit suliarineqassasut. Taamaattoqassappat paasisat UPA 2020-imi saqqummiunneqarsinnaassasut naatsorsuutigineqarpoq. Matumuuna siunnersuutigineqarpoq periaaseq aamma piffissamat pilersaarut pingaarnertigut imaassasog:

2017-ip qiteqqunnerani sumiiffiit misissuiffiusussat toqqarneqassapput, taamaalilluni naasogarfiiit aamma sumiiffiit suussusaat assigiinngitsut misissuinerami ilaatinneqartussat qulakkeerneqassallutik. Toqqaaneq taanna satellit-ikkut assilisat kiisalu paasisutissat nalunaarsukkat pioreersut il.il. tunngavigalugit pissaaq. Ukiumoortumik asimi suliaqarneq ingerlanneqartassaaq, tassani naasogarfinni uuttortaasoqartassalluni aammalu ukiup tulliani killuisoqartassalluni. Naasut killukkat inuussutissaqassusaannut il.il. naleqqiullugu misissorneqartassapput. Paasisat UPA 2020-imi saqqummiunneqarnissamat piareersimassasut naatsorsuutigineqarpoq.

Misissuinerit naasut katitigaanerat aamma sumiiffiit neriniarfiusartut iluanni neriniarfissatigut atasinnaassusaat pillugit ilisimasaniq nutaanik paasisaqarfigineqassasut naatsorsuutigineqarpoq. Misissuinerami paasinarsinneqassaaq sumiiffinni sorlarni neriniarfiusartut annertusineqarsinnaassanersut, kiisalu sumiiffinni sorlarni neriniarfiusartut tatisimaneqarpallaanersut. Ilisimasat taakkua taamaalilluni uumasuteqarnerup naleqqussarneqarnissaa pillugu siunnersuinerami atorineqarsinnaassapput. Sapinngisamik nunalerinerup pitsaanerpaanissaata aammalu neqinik tunisassiornerup annertusineqarnissaa pillugu Naalakkersuisut siunnerfiisa piviusunngortinneqarnissaasa qulakkeernissaannut pingaaruteqarpoq.

Pisortanut aningaasaqarnermut allaffissornermullu sunniutissat

Misissuineq ukiut pingasut ingerlaneranni agguarlugu ataatsimut katillugu 1,3 mio. koruunik akeqassasoq missingersorneqarpoq. Siunnersuut tapersersorneqassappat aningaasartuutit 2017-imi misissuinnernut atorpeqartussat matussutissaattut ilassutitut aningaasaliinissamik Naalackersuisut qinnuteqassapput. Tamatuma saniatigut Naalackersuisut siunnersuut 2018-imit aningaasanut inatsisissatut siunnersuummi aningaasartuutissaasinnaasut tulleriarneqarnerinut ilanngutissavaat.

Inuussutissarsiutinik ingerlataqartutut namminersortunut aningaasaqarnermut allaffissornermullu sunniutissat

Siunnersuut inuussutissarsiutinik ingerlataqartutut namminersortunut allaffissornermut aammalu aningaasaqarnermut toqqaannartumik sunniuteqassanngilaq.

Innuttaasunut aningaasaqarnermut allaffissornermullu sunniutissat

Siunnersuut innuttaasunut allaffissornermut aammalu aningaasaqarnermut toqqaannartumik sunniuteqassanngilaq.

Taamatut oqaaseqarlunga neriniartitsisarnerup misissorneqarnissaa pillugu siunnersuutip matuma Inatsisartuni kajumittumik suliarineqarnissaa inassutigaa.